


# ZAMAN DAN PERBEZAAN

---



M  
320-9595  
MAH

205402

APP

UCAPAN Y.A.B. DATO' SERI DR. MAHATHIR BIN MOHAMAD, TIMBALAN PRESIDEN UMNO MERANGKAP TIMBALAN PERDANA MENTERI MALAYSIA, SEMASA MERASMIKAN PERHIMPUNAN AGUNG TAHUNAN PERGERAKAN PEMUDA UMNO DAN PERGERAKAN WANITA UMNO PADA HARI KHAMIS 3HB JULAI, 1980 DI BALAI BUDAYA, DEWAN BAHASA DAN PUSTAKA, KUALA LUMPUR JAM 9.00 PAGI.



*ASSALAMUALAIKUM WARAHMATULLAHI  
WABARAKATUH.*

Saudara-saudara dan saudari-saudari,

Sekali lagi kita berkumpul, Pemuda dan Wanita UMNO, untuk bermesyuarat, untuk membincang pentadbiran parti kita, untuk membahar masalah-masalah yang kita hadapi di dalam dan di luar negara, untuk menentukan sikap dan dasar pergerakan kita, merancang cara dan arus yang hendak kita ikut, dan menentukan sedaya upaya kita, jika diizinkan oleh Allah Subhanahuwataala, nasib kita di masa depan.

Kita sedar bahawa kita tidak dapat tentukan dengan tepat sesuatu yang akan datang. Kita cuma boleh merancang. Yang menentukan ialah Tuhan yang menguasai sekalian alam. Tetapi tidak pula kita ditegah dari merancang. Insyallah, jika diizinkan Tuhan, rancangan kita akan berhasil. Kita cuma menambat unta dan berusaha sedaya upaya untuk menjaganya sambil kita menyerahkan kepada kehendak Tuhan. Unta masih boleh hilang, tetapi tentulah salah dan tidak bertanggungjawab jika kita biarkan sahaja unta

itu kerana Tuhan yang akan menentukan unta kita hilang atau tidak, seperti setengah orang yang cuma berkata "Insyallah" tanpa membuat usaha yang bersungguh-sungguh untuk menentukan yang dijanji akan ditunaikan.

Apa ada kena mengena soal ini dengan pemuda dan wanita dan mesyuarat ini. Kaitannya banyak kerana mesyuarat (apa juga mesyuarat) diadakan **untuk "menentukan" tindakan dan matlamat untuk masa depan**, iaitu merancang untuk masa depan — dan bagi pemuda walaupun apa yang berlaku sekarang adalah penting, tetapi tanggungjawab mereka pada masa depan adalah lebih penting. Bagi wanita juga demikian kerana wanita juga rata-rata dari golongan yang muda dan akan mewarisi tanggungjawab terhadap negara ini tidak lama lagi.

### *ZAMAN DAN PERBEZAAN*

Kita berada sekarang dalam **satu zaman yang jauh berbeza** dari zaman sebelum penjajah atau zaman penjajah atau pun zaman awalan Malaysia merdeka. Zaman ini yang bermula pada pertengahan tahun-tahun tujuh puluhan memperlihatkan pergolakan politik dan ekonomi yang luar biasa dan mempunyai kesan yang amat penting bagi kita. Jika kita tidak faham perubahan-perubahan yang berlaku dan apakah kemungkinannya bagi diri kita, boleh jadi kita akan luput dan hilang dari muka bumi ini. Ini bukan satu sangkaan yang tidak berasas tetapi adalah hasil perhatian yang cukup serius terhadap nasib beberapa negara dan bangsa yang telah hilang dari masyarakat dunia. Ini juga adalah hasil tinjauan terhadap per-

golakan politik dan ekonomi yang berlaku di seluruh dunia, khususnya di Asia Tenggara dan di Asia Tengah.

---

**Di zaman dahulu kejadian yang berlaku di tempat-tempat yang jauh dari negara kita tidak begitu mengancam nasib kita.** Dahulu perhubungan adalah sukar dan lambat. Tetapi hari ini kita boleh dengar, bahkan lihat senapang yang ditembak di sebalik sana dunia dengan serta merta, dan keputusan yang dibuat di Moscow atau Washington atau Peking ataupun Salisbury boleh mengubah nasib kita dengan sama kesannya seperti nasib orang Russia, atau orang Amerika, atau orang China atau orang Rhodesia. **Demikian bezanya zaman ini dengan zaman-zaman yang lepas.**

Memandang kepada hakikat inilah maka kita terpaksa mengambil kira perkembangan di seluruh dunia dan membentuk sikap dan dasar untuk menangkis yang buruk dan mengamal atau memperalatkan yang baik. Pergolakan politik dan ekonomi di seluruh dunia harus diambil kira sebagai contoh dan sebagai asas perancangan kita. Di samping itu kita tidak boleh lupa sejarah dan nilai-nilai yang mulia yang kita miliki kerana kita adalah orang Islam.

### *KEBANGKITAN ISLAM*

Apakah aliran dan peristiwa di dunia yang harus kita titikberatkan, kerana mempunyai kesan ke atas nasib kita. **Yang pertama dan utama ialah kebangkitan semula umat Islam** dan agama Islam sebagai suatu kuasa yang mempengaruhi semua perkembangan dan pembangunan di dunia. Sama ada bidang ekonomi atau



bidang politik atau apa juga bidang kegiatan manusia, tidak ada satu yang terlepas dari kesan dan pemikiran yang terdapat di dunia Islam hari ini. Seperti di zaman Khulafaul Rasyidin di waktu mana angkatan Islam telah mara dari padang-padang pasir di Semenanjung Arab untuk membawa cahaya Islam ke seluruh dunia, dalam tahun tujuh puluhan abad kedua puluh ini, melalui kekayaan yang dikurniakan Tuhan, sekali lagi orang-orang Islam dari padang pasir telah mara ke dalam arena antarabangsa untuk menentukan berbagai perkembangan.

Perkembangan ini bukan dirancang oleh orang Islam kerana ingin menakluk dunia tetapi adalah semata-mata kurniaan Allah Subhanahuwataala — kerana Allah yang menyimpan begitu banyak kekayaan di bumi yang tidak diinginkan oleh segala penjahat.

Malaysia, dan orang Melayu, dan UMNO pun terlibat dalam perkembangan ini. Kerana orang Arab menguasai kawasan yang banyak minyak, maka mereka dapat menentukan paras kenaikan harga yang tinggi. Kerana harga yang tinggi maka menjadi ekonomikal usaha carigali dan mengeluarkan minyak Malaysia yang terdapat di tengah laut. Kerana memiliki sumber minyak sendiri, kenaikan harga minyak bukan sahaja tidak menjejaskan ekonomi Malaysia tetapi menolong meningkatkan ekonomi. Alhamdulillah, semua ini adalah kuasa Tuhan.

---

Sebagai orang Islam kita tentu bersyukur kehadiran Allah Subhanahuwataala. Bersyukur bukan bermakna semata-mata menadah tangan dan mengecap nikmat. **Bersyukur bermakna kita memberi nilai yang tinggi kepada nikmat yang kita terima dan kita usaha**

mengedar nikmat itu kepada mereka yang belum nampak cahaya Islam. Dengan perkataan lain seperti orang Mekah dan Madinah yang setelah memeluk agama Islam telah berusaha mengembangkannya sehingga menjadi agama kepada orang-orang dari Sepanyol hingga ke China, kita juga harus memperkekalkan nikmat dari Tuhan untuk maksud yang sama.

### KECEKAPAN

Bezanya antara orang Islam yang mengembangkan agama di zaman nabi dan sahabat-sahabatnya dengan orang Islam di zaman ini ialah hasil dari anutan agama Islam, orang Islam di zaman nabi dan sahabat-sahabatnya telah menuntut berbagai ilmu kerana disuruh oleh agama, yang menjadikan mereka orang yang penuh pengetahuan dan kecekapan dalam berbagai bidang. Dengan keyakinan mereka kepada agama Islam dan pengetahuan serta kekayaan mereka, mereka dapat mempertahankan wilayah mereka dari serangan oleh musuh-musuh mereka. **Kejayaan orang Islam dalam berbagai lapangan dan sikap toleransi mereka terhadap rakyat mereka yang bukan Islam, bukan sahaja menolong membesarkan wilayah Islam tetapi menarik lebih ramai orang-orang bangsa lain menganut agama Islam.** Orang Melayu telah memeluk agama Islam 600 — 700 tahun dahulu semata-mata kerana orang Islam dari Semenanjung Arab dan India ketika itu menguasai perdagangan di Asia dan cekap dalam pelayaran melintas lautan yang luas. Tanpa kegiatan berniaga dan kecekapan belayar orang-orang ini mungkin orang Melayu akan kekal dalam kegelapan kerana tiada ada siapa yang membawa Islam kepada mereka.

Sebaliknya orang Islam yang dikurnia kekayaan yang tidak terhingga di zaman ini, walaupun telah menunjuk minat kepada nilai dan ajaran Islam, terdiri dari orang yang bukan sahaja tidak mempunyai pengetahuan yang cukup tetapi kadang-kadang sengaja tidak mahu tuntut ilmu. Ada segolongan yang begitu asyik kononnya mengejar syurga di akhirat sehingga mereka cuba mengubah agama Islam dari satu agama yang pragmatik dan toleran kepada satu agama yang ritualistik dan dogmatik.

### PERPECAHAN

Mereka bukan sahaja cuba menjadikan yang sunat itu wajib dan yang wajib jadi sunat, tetapi mereka reka bentuk berbagai ibadat yang tidak pun menjadi ibadat dalam agama Islam. Dalam keinginan mereka memamerkan minat mereka terhadap agama, mereka membandingkan diri mereka sebagai orang yang kononnya alim dan warak dengan orang lain yang mengikut laungan pendapat mereka bukan sahaja tidak warak seperti mereka tetapi tidak begitu Islam atau tidak Islam langsung. Akibat perbandingan yang dibuat oleh mereka, masyarakat Islam terbahagi dua dan bahagian-bahagian ini pula dipecah-pecahkan — golongan yang menganggap diri mereka betul Islam pun terbahagi kepada beberapa kumpulan yang saling bertentangan dan kumpulan yang dikatakan tidak Islam juga terbahagi kepada berbagai kumpulan.

Dengan ini maka orang-orang Islam yang begitu kaya telah berpecah belah dan tidak dapat mempengaruhi atau mengembangkan Islam di kalangan orang lain. Dibandingkan dengan zaman Khulafaul Rasyidin dan Khalifah-Khalifah awalan, bilangan orang yang bukan

Islam yang berminat memeluk agama Islam kerana kegiatan dakwah amatlah berkurangan. Sebaliknya tingkahlaku dan lagak setengah-setengah orang Islam yang mahu menonjol kononnya keagungan Islam dan semangat kelslaman mereka telah memburukkan imej Islam. **Agama Tuhan yang suci, adil dan baik dalam semua segi ditunjuk sebagai agama yang bengis, yang menindas dan tidak menghiraukan apa-apa nilai baik yang diterima akal.** Percubaan dibuat untuk menjadikan nilai yang baik itu adalah buruk dalam agama Islam, dan nilai yang buruk itu adalah baik dalam Islam. Tetapi apabila orang bukan Islam mengamalkan nilai yang terbalik ini dan orang Islam menjadi mangsa, kumpulan yang memutarbelit Islam tidak pula sanggup menerimanya. Jelaslah bahawa orang yang sengaja menukar nilai-nilai hidup kononnya supaya secucuk dengan Islam, cuma berbuat demikian kerana kepentingan diri. Mereka mempunyai dua ukuran, yang satu untuk diri sendiri dan yang satu lagi untuk orang lain. Dengan amalan dua ukuran nilai ini maka sekali lagi imej Islam menjadi buruk di kalangan orang bukan Islam dan menyebabkan mereka tidak tertarik dengan Islam, jauh sekali dari memeluknya.

### *KELEMAHAN*

Dalam keadaan yang mana ramai orang Islam tidak jujur kepada agama Islam yang sebenar, lemah pengetahuan dan kecekapan, tidak mempunyai kekuatan tersendiri dalam mempertahankan diri, berpecahbelah dan menonjol kelakuan yang tidak baik, walaupun mereka sudah jadi kaya dan dapat mengancam dunia dengan kuasa minyak yang ada pada mereka, namun tidak ada perkembangan agama Islam seperti yang

berlaku di zaman nabi dan sahabat-sahabatnya serta khalifah-khalifah awalan. Percubaan kononnya untuk mengukuh pegangan orang yang sudah Islam kepada ajaran dan amalan Islam cuma mengujudkan golongan-golongan dakwah yang bukan sahaja bertentangan antara satu dengan yang lain, tetapi yang lebih mengutamakan riak dari cara-cara berdakwah yang sebenar. **Tidak ada percubaan yang bersungguh-sungguh untuk memperkenalkan Islam ke golongan bukan Islam mengikut kelslaman yang sebenar dan yang sudah tentu menarik.** Ada pula yang menganggap pengislaman orang yang bukan Islam tidak penting kerana kemungkinan mereka ini menjadi Islam kerana kepentingan lain atau kelslaman mereka akan cetek sahaja. Orang yang berpendapat begitu sudah lupa bahawa nenek-moyang mereka sendiri juga waktu mula memeluk agama Islam mungkin mempunyai sikap yang tidak begitu jujur terhadap Islam. Tetapi selepas beberapa lama dan beberapa keturunan kepercayaan dan kejujuran kepada agama Islam telah meningkat sehingga tidak boleh diragukan lagi. Orang Arab yang diislamkan di zaman nabi juga adalah keturunan orang Jahiliah. Oleh itu tidaklah mustahil orang yang mula menerima Islam hari ini, walaupun dengan cara yang cetek, akan menjadi orang yang lebih faham dan lebih kukuh pegangan kepada Islam setelah beberapa generasi. Oleh itu tidaklah wajar pendapat bahawa dakwah di kalangan orang Islam adalah lebih penting dari dakwah di kalangan orang bukan Islam. Dan lebih tidak wajar lagi ialah pendapat bahawa perkembangan Islam di kalangan orang bukan Islam tidak perlu kerana orang Islam sendiri sudah jadi kaum Jahiliah yang perlu diislamkan semula.

Saudara-saudara dan saudari-saudari sekalian,

Pengetahuan dan fahaman yang mendalam terhadap perkembangan di zaman ini di seluruh dunia, dan lebih-lebih lagi dalam dunia Islam yang kita menjadi sebahagian darinya, amatlah penting bagi kita. Bagi pemuda dan wanita yang bersidang pada hari ini dan akan menentu sikap dan dasar, pengetahuan tentang sejarah dan aliran politik dan ekonomi akan menentukan bahawa pendapat masing-masing dikeluarkan secara logik dan berilmiah dan akhirnya keputusan dibuat dengan penuh kesedaran dan fahaman tentang baik buruknya keputusan itu. Dengan perkataan lain, **kita akan lebih terselamat akibat pendirian kita dalam mesyuarat ini jika kita mempunyai pengetahuan yang cukup dari semua aspek.**

Malaysia hari ini adalah sebagai satu pulau yang tenang (secara relatif) dalam lautan yang bergelombang besar. Dari segi politik kita lihat negara-negara berdekatan dalam keadaan tidak tentu arah. Ada yang mempunyai kedudukan yang tidak kukuh dan mudah tumbang. Akibatnya ialah ketidakstabilan yang mengancam bukan sahaja Kerajaan dan jenteranya tetapi rakyat sendiri. Kehidupan rakyat menjadi sukar kerana perlindungan yang biasa menjadi tanggungjawab Kerajaan tidak dapat dipikul oleh Kerajaan. Keselamatan nyawa dan harta benda tidak dapat diharapkan. Segala keburukan anarki menimpa semua rakyat. Akhirnya ancaman dari luar negeri sama ada ideologikal atau politikal atau militer mungkin menjadi realiti dan negara mungkin ditawan oleh orang asing secara langsung atau tidak langsung.

### *POLITIK DAN RAKYAT*

Di lain-lain negara pula kita dapati demokrasi di-

ketepikan oleh pemerintah atas alasan keperluan kestabilan dalam negara dan untuk menghadapi ancaman musuh. **Rakyat dipisah dari hak menentukan kepimpinan pilihan mereka.** Dengan ini maka kehendak dan kepentingan rakyat tidak lagi mendapat layanan. Mereka terpaksa tunduk kepada Kerajaan dan menerima sahaja apa yang dirancang dan dibebankan oleh Kerajaan ke atas mereka.

Di lain-lain wilayah di dunia keadaan politik juga kucar-kacir. Perpecahan dan permusuhan yang ketat berlaku di kalangan rakyat sehingga kadang-kadang peperangan saudara tercetus. Akibatnya kuasa asing mencampurtangan dan memasuki serta mengekalkan kuasa mereka atas bermacam alasan. Dengan ini sistem penjajahan dahulu telah balik semula walaupun dalam bentuk yang berlainan.

Dalam segi ekonomi pula, rakyat semua negara seluruh dunia dihadapi dengan tekanan inflasi, kekurangan barang perlu dan kelembapan pertumbuhan. Ramai yang menganggur atau tidak lagi dapat pendapatan yang mencukupi. Tindakan mereka mengadakan mogok dan lain-lain untuk menambah pendapatan cuma meningkat paras kenaikan inflasi dan menjadikan mereka lebih miskin. Negara yang dahulu kaya raya sekalipun tidak terkecuali dari nasib buruk ini dan tidak dapat elak kesan kenaikan harga serta pengurangan keluaran minyak.

Tetapi walaupun Malaysia merasai juga kesan-kesan perkembangan politik dan ekonomi dunia yang buruk, keadaannya tidaklah begitu buruk. **Demokrasi masih boleh berjalan di negara ini dan calon parti pembangkang masih boleh dipilih mewakili setengah-setengah**

**rakyat yang inginkan mereka.** Parti yang berjaya menjadi Kerajaan masih terpaksa mengambil berat kehendak-hendak rakyat untuk mengekalkan sokongan rakyat terhadapnya. Majoriti rakyat masih bersatupadu dan mengutamakan negara daripada parti atau diri sendiri. Oleh itu ketahanan negara masih boleh dijamin. Di antara satu pilihanraya dengan satu pilihanraya ketenangan secara relatif wujud dan tumpuan dapat diberi kepada pembaikan dan usaha mengatasi masalah yang dihadapi oleh rakyat dan negara.

### *KETENANGAN TERANCAM*

Walaupun demikian ketenangan di negara ini tidak boleh dianggap sebagai peristiwa biasa sahaja yang tidak perlu dipelihara dan dilindung. Kejayaan sesuatu usaha bergantung kepada kebolehan mengenal tanda-tanda awalan (early warning). Tidak ada gunanya bertindak apabila masa telah terlewat dan nasi sudah jadi bubur.

Memandang kepada kejadian dan peristiwa-peristiwa yang berlaku di negara kita dalam masa-masa yang lewat ini dan aliran yang didapati di negara-negara lain yang mempunyai latar belakang yang lebih kurang sama dengan kita, **kita tidak syak lagi bahawa ketenangan yang terdapat sekarang sudah mula diancam.** Jika tidak disekat dengan cara yang berkesan ancaman akan meningkat sehingga negara akan terjerumus dalam berbagai peristiwa politik dan ekonomi yang boleh menghancurkan negara ini dan mungkin menjadinya sekali lagi dijajah dalam bentuk-bentuk yang lain.



Persidangan Pemuda dan Wanita hari ini harus mengingati dan mengambil berat latar belakang dan kemungkinan-kemungkinan yang telah saya senaraikan. Persidangan Pemuda dan Wanita harus mengenal tanda-tanda awalan tentang kemungkinan negara ini sekali lagi akan mengalir ke arah penjajahan. Persidangan Pemuda dan Wanita harus mendedahkan dengan beraninya tanda-tanda yang tidak sihat ini dan dengan itu berani pula menentukan sikap tersendiri yang tidak terpengaruh dengan keinginan mencari jalan yang mudah dengan menyertai iklim dan emosi semasa.

### *“SUBSTANCE” DAN “FORM”*


Kita tahu apa yang sebenarnya dikehendaki dari kita untuk mencapai kejayaan dan melindungi agama yang suci yang kita anuti. **Malangnya masih ramai dari kita yang mengutamakan “form” daripada “substance” atau rupabentuk daripada isi kandungan.** Dalam pegangan kepada agama sekalipun, sifat mengutamakan form daripada substance ini berleluasa. Amalan yang jelas dituntut oleh agama seperti persaudaraan, tuntutan ilmu dan melengkapkan diri untuk pertahanan tidak diendahkan. Sebaliknya soal janggut, serban dan jubah yang diberi keutamaan. Dengan perkataan lain yang sunat diwajibkan, tetapi yang wajib ditinggalkan. Semua ini ialah oleh kerana keutamaan yang diberi kepada rupabentuk yang dikatakan menggambarkan kelslaman — dan tidak kepada kandungan ajaran dan aqidah kelslaman yang tidak begitu mudah dipamerkan. Riak yang jelas dilarang oleh agama sudah jadi amalan.

Pemuda dan Wanita UMNO tidak perlu menonjol rupabentuk rekaan yang kononnya dikatakan Islam kerana ini bukan sahaja tidak penting tetapi sebagai perbuatan riak adalah bertentangan dengan Islam. Saudara dan saudari tidak perlu meniru perbuatan yang begitu ketara sekarang sebagai satu usaha bersaing dengan orang yang telah memperalatkan agama untuk kepentingan diri. Kita tidak perlu berlumba-lumba dalam pameran apa yang kononnya mencerminkan rupabentuk Islam.

**Yang perlu bagi kita ialah mengamalkan ajaran Islam yang sebenar — mewajibkan yang wajib, meng- harus yang harus, dan mengikut sunnah sebagai sunnah.** Pemuda dan Wanita harus tekankan kepentingan pelajaran, persaudaraan, kekuatan per- tahanan, pengelakan dari kemiskinan di samping amalan-amalan ibadah yang wajib yang menjadikan kita orang Islam. Dengan perkataan lain kita akan utamakan isi kandungan Islam dan bukan apa yang ditafsir oleh golongan tertentu sebagai rupabentuk Islam. Islam tidak duduk kepada jenis kain yang dipakai, jauh sekali kepada potongannya yang tertentu. Islam berada kerana aqidah, kerana iman yang teguh yang membawa kepada amalan yang baik semata- mata.

Tidak ada amalan yang pada akal tidak baik, yang disuruh oleh agama Islam. Islam tidak pernah suruh umat Islam berpecahbelah kerana ini jelas tidak baik.

“Berpeganglah kamu kepada tali Allah dan jangan- lah kamu bercerai-cerai” Allah berfirman dalam surah Ali-Imran Ayat 103.



Tetapi malangnya ada orang yang berkata dan menulis, bahkan berusaha supaya perpaduan dan persaudaraan antara orang Islam tidak dapat dicapai. Dan mereka dengan beraninya berkata mereka memecahbelah orang Islam kerana Islam.

## ILMU

Begitu juga dengan menuntut ilmu. Islam memang menyuruh orang Islam menuntut ilmu walaupun ke negeri China. Apakah ilmu yang nak dituntut di negeri China di zaman nabi Muhammad S.A.W.? Apakah agama Islam yang nak dituntut di situ? Tentu tidak, kerana di masa hayat nabi agama Islam belum sampai ke negeri China. Ilmu yang disuruh orang Islam menuntut tentulah ilmu sains, hisab, ilmu alam dan lain-lain yang sudah berkembang di negeri China.

Tetapi sekarang ini orang yang suka memecahbelahkan orang Islam juga cuba melemahkan mereka dalam bidang ilmu pengetahuan supaya sampai bila pun orang Islam terpaksa bergantung kepada orang lain untuk kehidupan dan keselamatan mereka. **Kerana kelemahan pengetahuanlah maka hari ini orang Islam dan negara-negara Islam terpaksa meminta pertolongan orang lain tiap-tiap kali mereka menghadapi masalah.** Jika orang Islam menguasai semua ilmu, mereka akan dapat mengeluarkan semua kepentingan mereka sendiri tanpa pertolongan dari orang lain. Jelaslah bahawa orang yang sengaja menyekat pelajaran ilmu di kalangan orang Islam mengkhianati agama Islam.

Mereka kononnya tidak bersetuju dengan perancangan keluarga kerana ini mengurangkan bilangan

orang Islam. Tetapi mereka juga cuba menyekat wanita Islam dari menuntut ilmu kerana kononnya tugas wanita ialah menjaga rumah semata-mata. Dengan perbuatan ini mereka mengurangkan bilangan orang Islam yang effective sebanyak separuh. Apakah maknanya tambahan bilangan ummat jika tambahan ini tidak menambah tenaga orang Islam dalam bidang-bidang yang mereka sekarang terancam.

**Agama Islam tidak menjadi penghalang kepada kemajuan dan usaha meningkatkan ketahanan orang Islam. Tetapi penyelewengan dan kepentingan orang-orang yang memperalatkan agama Islam ialah sebabnya kemajuan orang Islam terhalang.**

### PERJUANGAN

Tugas UMNO, khusus Pemuda dan Wanita ialah mengamal dan mengembang ajaran Islam yang sebenar. Kita tidak boleh dipesong oleh tafsiran dan amalan salah yang dibuat oleh golongan orang yang cuma memandang Islam sebagai alat perjuangan mereka. Kita tidak boleh membenarkan diri kita diperangkap dengan cara-cara buruk yang diamalkan oleh satu golongan orang Islam yang tidak takut kepada Tuhan, Rabbulalamin. Hari ini mereka berjaya menjadikan orang Islam yang sedikit di negara ini berpecah kepada dua kumpulan yang saling bertentangan. Perpaduan cuma boleh dicapai dengan golongan yang kecil yang datang kemudian ini menolak ajaran yang salah dan balik ke pangkal jalan untuk menyertai perjuangan golongan orang Islam yang besar — perjuangan Islam yang sebenar — perjuangan yang bukan bercorak rupabentuk atau form tetapi

menekankan isi kandungan atau "the contents of Islam". Kita harus ingat bahawa dahulu kita cuma satu, sehinggalah satu kumpulan dari kita, kerana mahu tempat bagi diri sendiri, telah memisah diri untuk mengujudkan kumpulan serpihan yang menentang kita. Dan apabila kita menerima mereka balik demi kepentingan perpaduan, mereka cuma sanggup setakat yang menguntungkan diri mereka sahaja. Dengan tidak sedikit pun menghirau kesan perbuatan mereka, mereka melakukan perpecahan sekali lagi atas sebab yang lemah. Kerana mahu menjatuhkan seorang maka perpaduan orang Islam dihancurkan.

Kali ini perpaduan cuma boleh diadakan secara mereka membubarkan diri atau dengan orang mereka menolak kegiatan yang merugikan Islam dan balik ke pangkal jalan. Dengan itu sahaja mereka boleh diterima balik, kerana dengan cara itu tidak lagi mereka akan dapat memecah perpaduan orang Islam sekali lagi.

Saudara dan saudari sekalian, penyatuan semula ini mungkin tidak berlaku sekarang. **Tetapi sebagai ahli UMNO dan pendukung cita-cita UMNO yang memang berasas kepada Islam, saudara saudari akan memperjuangkan supaya di satu hari perpaduan dan penyatuan yang benar akan tercapai dan tidak ada lagi golongan yang menjadi duri dalam daging bagi kaum kita.**

## SEJARAH

Dalam usaha ini kita harus menoleh ke belakang untuk melihat sejarah kerana sejarah mempunyai

banyak ajaran yang berguna kepada kita. Masyarakat manusia yang berakal harus meneliti sejarah untuk mengelak dari kesalahan-kesalahan di masa yang lampau. Sesungguhnya banyak tauladan yang boleh menjadi panduan kepada kita. Tetapi dalam konteks perpaduan, yang menjadi satu rukun dalam perjuangan UMNO, beberapa peristiwa sejarah harus diberi perhatian yang serius.

Di zaman British memerintah Tanah Melayu, seperti di zaman Belanda di Indonesia, pengekalan penjajahan mereka diasaskan kepada polisi "Divide and Rule". Di Malaysia bukan sahaja kaum-kaum dipisahkan dan dilaga antara satu sama lain tetapi di dalam kaum Bumiputera (Melayu) usaha dibuat oleh British untuk membahagi-bahagikan mereka kepada kumpulan-kumpulan tertentu yang saling bertentangan.

British sependapat dengan seorang Islamist Belanda yang bernama Christian Snouck Hurgronge. Mengikut professor Belanda ini, yang begitu arif dalam agama Islam sehingga ia berjaya menyeludup pergi ke Mekah, **cara melemahkan orang Islam ialah melalui pelajaran yang berbeza-beza untuk kumpulan-kumpulan tertentu.** Kononnya jika satu kumpulan elitist diberi pelajaran Belanda dan yang lainnya dibiarkan dengan pelajaran tradisional, kumpulan elitist ini akan memihak kepada Belanda sementara mereka yang mendapat pelajaran tradisional di pondok yang menitikberatkan agama Islam akan menjadi begitu mundur sehingga terlalu lemah untuk menentang Belanda.

Usaha British di Malaysia memang mencapai satu tahap kejayaan. Kaum-kaum di Malaysia diasingkan

dan kaum Melayu khususnya dipecah kepada kumpulan elit yang berpelajaran Inggeris yang bekerja dengan Kerajaan dan kumpulan berpelajaran tradisional yang tidak berpekerjaan tetap. Elitist Melayu umumnya memandang rendah kepada golongan yang berpelajaran Melayu atau Arab dan tidak mengadakan perhubungan dengan mereka.

Tetapi dasar "divide and rule" British serta Belanda telah "backfire" kerana satu bahagian dari yang mendapat pelajaran British dan Belanda telah menolak konsep elit dan memandang ilmu yang mereka perolehi sebagai senjata melawan balik penjajah. Mereka berpendapat bahawa penjajah mesti dilawan dengan senjata penjajah sendiri. Kalau di zaman feudal politik terhad kepada istana dan sekitarnya sahaja, di zaman penjajah politik yang berkesan terpaksa diasas kepada demokrasi atau pergerakan massa. Dengan ini maka segolongan dari elit Melayu telah menyatupadu diri mereka dengan orang yang berpelajaran tradisional Melayu dan agama. Kebolehan mereka yang mahir dengan pentadbiran dan susunan kerja penjajah, seperti susunan mass organisation dan gerakan yang boleh menggugat pemerintah, memberi kesan kepada perjuangan menentang Malayan Union dan menuntut kemerdekaan.

### *KUMPULAN ELIT*

Mungkin ada pendapat bahawa sama ada kumpulan elit Melayu yang diberi pelajaran oleh penjajah menyertai dan memimpin perjuangan mencapai kemerdekaan atau tidak, lambat laun kemerdekaan akan

tercapai. Zaman penjajahan sudah tidak sesuai lagi sekarang. Tetapi sungguhpun mungkin kemerdekaan akhirnya dicapai, bentuk kemerdekaan dalam negara yang berbilang kaum ini mungkin tidak seperti yang diinginkan, selain dari memakan masa dan mungkin korban yang banyak. Palestin juga menuntut kemerdekaan tetapi yang berkuasa apabila merdeka ialah orang Yahudi. Begitu juga ramai dari tanah jajahan yang akhirnya merdeka setelah memberontak — tetapi yang berkuasa ialah komunis atau diktator ketenteraan. Rata-rata tanah jajahan yang telah capai kemerdekaan tidak dapat memerintah diri sendiri dengan cara yang membawa kemajuan dan kebahagiaan kepada penduduknya.

**Ketenangan dan kemajuan Malaysia hari ini tidak boleh dipisahkan dari kesanggupan kepimpinan yang walaupun dilatih supaya menjadi alat penjajah, tetapi telah menyertai gerakan rakyat sepenuhnya.** Di samping itu perpaduan golongan elit ini dengan semua kumpulan rakyat termasuk yang berpelajaran agama telah menggagalkan polisi "divide and rule" British. Tidaklah salah jika kita katakan bahawa senjata pelajaran yang nak digunakan oleh British bagi mengekalkan pemerintahan mereka telah diguna oleh sebilangan yang tidak kecil dari orang Melayu untuk menikam balik British. Sistem barat yang mereka pelajari seperti konsep demokrasi dan "mass movement" dan cara-cara bertindak melalui rundingan telah membolehkan golongan ini menyusun langkah supaya semua rakyat dapat menyertai perjuangan kemerdekaan dengan cara yang berkesan. Kemerdekaan telah dicapai dalam keadaan alat-alat negara tidak rosak dan sedia diguna untuk kesejahteraan dan kebahagiaan rakyat Malaysia.



Yang mencatatkan perjuangan ini ialah pemisahan satu kumpulan pemimpin yang telah sama-sama memelopori kegiatan menentang British. Kumpulan ini merasa irihati kerana rakyat memberi kepercayaan juga kepada kumpulan elit yang tahu rahsia kekuatan barat dan tahu tentang jenis-jenis senjata yang boleh menumbangkan kuasa British. **Memandang bahawa rakyat yang menyokong UMNO tidak mungkin menolak pemimpin non-tradisional yang sanggup bergabung dengan pemimpin tradisional, maka beberapa pemimpin tradisional yang cuma memikirkan tentang tempat bagi diri sendiri sahaja telah memecahkan perpaduan dan keluar untuk membentuk kumpulan serpihan.** Mereka ini memperalatkan agama sebagai daya penarik dengan harapan bahawa dengan cara ini maka parti mereka akan capai kemenangan dan merekalah yang akan mendapat segala hak dan tempat orang yang berkuasa.

### *PENTINGKAN DIRI*

Kita bernasib baik kerana kumpulan yang mementingkan diri ini tidak besar dan tidak dapat menarik sokongan rakyat. Dalam pilihanraya pertama pada tahun 1955 mereka cuma menang satu kerusi. Dengan kegagalan mereka maka perjuangan UMNO untuk mencapai kemerdekaan tidak terhalang. Jikalau kumpulan serpihan ini menang banyak kerusi, mungkin pihak penjajah tidak akan bersetuju memberi kemerdekaan, atau pun bentuk Malaya yang merdeka diubah coraknya supaya orang Melayu tidak terdapat kuasa apa-apa.

Apakah ajaran yang boleh didapati dari ini. Yang pertama ialah walaupun pelajaran diguna oleh penjajah

untuk memecahbelah dan menjajah, tetapi di Indonesia dan di Malaysia ramai dari mereka yang hendak diperalat oleh penjajah telah sebaliknya menentang penjajah.

Yang keduanya kerana mereka ini tahu selok-belok dan tabiat penjajah maka mereka dapat memperalatkan sistem dan pendekatan yang sesuai dengan psikologi penjajah untuk menewaskan mereka. Langkah-langkah yang diambil oleh kumpulan ini menubuh satu mass movement yang kemudiannya menggunakan tindakan-tindakan yang sesuai dengan mass movement telah dapat mematahkan rancangan British di Malaysia. **Tidak syak lagi kepintaran menyusun langkah dan berunding yang ditunjuk oleh pemimpin-pemimpin UMNO berasas kepada gabungan mereka yang diberi didikan elitist oleh British dengan mereka yang dididik dalam sistem tradisi dan agama.** Gabungan ini menentukan imbalan yang dikehendaki oleh agama — iaitu tugas dan tanggungjawab ditentukan oleh kecekapan yang ada pada pemimpin.

Ini membawa kita kepada pelajaran yang ketiga, iaitu kesanggupan bersatupadu antara semua aliran pelajaran dan peringkat yang ditunjuk oleh kebanyakan elit Melayu yang dididik oleh British. Sikap ini telah menyekat nilai kebaratan yang berasas semata-mata kepada materialisma, daripada menguasai UMNO dan negara kemudiannya. Kumpulan elit ini telah menerima pendapat mereka yang berpengetahuan agama supaya kehendak agama diutamakan sambil mengambilkira keadaan di dalam negara di mana orang Islam adalah minoriti. Sebab itu Malaysia yang merdeka menerima Islam sebagai agama rasmi dan unsur keislaman mempengaruhi bentuk negara Malaysia.

Umumnya pengalaman kita dengan kumpulan elit yang berpelajaran kebaratan ialah pengetahuan mereka berguna dan mereka adalah sebahagian dari kita. Usaha untuk mengasing dan memisah golongan ini dari urusan mentadbir dan pembangunan negara tidak harus dibuat. Memang ada satu kumpulan di Malaysia sekarang yang cuba membangkitkan perasaan benci kepada orang-orang yang kononnya berpelajaran barat dan oleh itu mempunyai dan mengamal nilai-nilai materialis barat.

### *KEBENCIAN*

Usaha untuk memisah orang-orang ini daripada orang yang mendapat pelajaran tradisional atau pelajaran agama cuma akan menjayakan hasrat penjajah dahulu, hasrat yang diteroka oleh Christian Snouck Hurgronge. Jika pecahbelah berlaku sekarang, maka Snouck Hargronge akan ketawa dalam jiratnya, akan menepok belakang dan kata syabas kepada orang yang selalu sangat menyebut nama Snouck Hurgronge untuk menimbul kebencian kepada sebahagian dari pemimpin Melayu. **Orang ini sebenarnya berjuang bermati-matian untuk menjayakan hasrat Snouck Hurgronge.**

### *UMNO DAN PERPADUAN*

Saudara saudari sekalian, saya mengambil masa sedikit menerangkan perkara ini kerana kita harus berwaspada sepanjang masa. UMNO ialah parti perpaduan, sesuatu yang dituntut oleh agama Islam. Oleh itu kita tidak boleh tumpukan perhatian kepada ber-

bagai jenis perbezaan dalam masyarakat Islam dan Melayu. Tidak ada kaum buruh dan kaum kapitalis dalam UMNO, tidak ada golongan yang sekular dan golongan yang mementingkan akhirat semata-mata dalam UMNO, tidak ada ideologist kebaratan dan ideologist ketimuran dalam UMNO, tidak ada puak tua dan puak muda dalam UMNO, tidak ada orang bandar dan orang desa dalam UMNO melainkan semuanya adalah orang Melayu yang beragama Islam yang mempunyai minat yang penuh untuk menegakkan agama Islam dan mempertahankan negara mereka. Kerana sifat-sifat kelslaman inilah maka UMNO akan terus berusaha menyatupadukan semua orang Islam berbangsa Melayu di Semenanjung dan bekerjasama dengan lain-lain warganegara Malaysia yang tidak menentang matlamat perjuangan UMNO. Kita sanggup menerima orang yang biasa menentang kita asalkan mereka terima prinsip perpaduan dan tidak mempermainkan agama atau menentang pelaksanaan kehendak agama Islam yang sebenar yang dibuat oleh UMNO.

Prinsip perpaduan dalam UMNO dan di luar UMNO adalah satu prinsip yang penting yang telah membawa kejayaan yang banyak bukan sahaja kepada UMNO tetapi juga kepada negara Malaysia. Walaupun ahli UMNO bebas mengkritik dasar dan kepimpinan dan bertanding untuk merebut jawatan-jawatan dalam UMNO, semua ini dibuat tanpa merosakkan perpaduan. Memang benar ada kalanya beberapa orang telah lupa kepada perpaduan dan mengutamakan hasrat diri atau kumpulan. Mereka ini menggunakan cara-cara yang buruk dan terkeluar dari aturan peraturan kerana ingin mendapat sesuatu tempat bagi diri mereka.

Saya ingin mengingatkan mereka ini bahawa kemenangan tidak bermakna jika akibatnya ialah perpecahan dan yang menjadi juara pertarungan dalam parti ini mendapat cuma sebahagian sahaja dari parti. Juara seperti ini tidak menang sebenarnya kerana dianya akan memimpin cuma orang yang menjadi penurutnya sahaja, sementara yang sebahagian lagi terus menolaknya dan tidak menyertai gerak-geri parti lagi. Dianya menjadi cuma pemimpin separuh — half a leader — dan ini membuktikan bukan kecekapannya tetapi kegagalannya sebagai pemimpin. Umumnya apa yang disifat olehnya sebagai kejayaan akan melemahkan parti dan akhirnya negara. Pada analisa terakhir pemimpin ini akan menjadi pemimpin tanpa penganut.

### PETANDINGAN

Inilah sebabnya yang kita mahu pertandingan merebut apa juga jawatan dalam parti dijalankan dengan cara teratur dan mengikut amalan-amalan demokrasi yang baik. **Wang tidak harus diguna, begitu juga taktik menambah ahli menjelang pemilihan, mengugut dan mengangkut penyokong ke sana ke sini.** Pemimpin-pemimpin atau bakal pemimpin parti yang kaya raya harus beringat bahawa dalam UMNO tidak ada perpisahan antara yang berada dengan yang tidak berada — terutama di kalangan mereka yang menjadi pemimpin. Yang penting ialah kekuatan dan perpaduan dalam parti dan bukan kejayaan puak-puak dalam parti mengikut taraf pelajaran atau ekonomi atau tempatan. Mereka yang mempunyai minat untuk menjadi pemimpin dalam parti harus sedar bahawa ahli-ahli UMNO sudah matang dan pemilihan yang dibuat oleh mereka tanpa taktik-taktik yang kotor adalah sebaik-

barat yang menjadikan wanita semata-mata sebagai simbol seks untuk membangkitkan perasaan tanpa kawalan. Gerakan Women's Lib di barat adalah hipokrit semata-mata, guna untuk memberi wanita hak yang sama dengan lelaki dalam melakukan maksiat. Semakin lama semakin buruk kelakuan wanita barat sehingga kita tidak lagi dapat meninjau apa lagi yang buruk daripada kelakuan mereka sekarang. Tetapi keesokan hari kita akan lihat pencapaian satu lagi tahap kelakuan yang lebih buruk dari itu.

Kesedaran di kalangan wanita tentang pengaruh buruk dari barat adalah sesuatu yang kita harus bersyukur. Tanpa kesedaran ini kita akan terjerumus ke dalam lembah kehinaan yang menjadikan wanita semata-mata sebagai "sex object".

Dalam pada itu reaksi wanita pula mestilah merupakan reaksi yang waras yang berpandu kepada ajaran agama yang sebenar. Kini terdapat terlalu ramai yang menolak apa yang datang dari barat semata-mata kerana ia datang dari barat. Tidak ada penilaian dibuat sama ada sesuatu itu benar-benar datang dari barat, dan jika barat sama ada bertentangan dengan ajaran Islam atau tidak. Kerana tidak ada penilaian yang waras inilah maka kita dapati ada wanita yang tidak mahu mengejar ilmu yang kononnya barat dan sekular dan lain-lain lagi penolakan yang melemahkan tenaga kita orang Melayu dan Islam. Mereka ini tidak memikirkan bahawa bilangan orang Islam di negara ini tidak begitu besar. Pengasingan wanita dari penguasaan ilmu-ilmu penting dan pemisahan mereka dari berbagai aktiviti mengurangkan tenaga orang Islam sebanyak separuh.

**Wanita UMNO bukan sahaja tidak harus terpengaruh dengan trend ke arah rekaan rupabentuk**

Islam tanpa nilai-nilai Islam yang sebenar, tetapi wanita UMNO harus menyedarkan kaum perempuan tentang ajaran Islam yang sebenar, dan mengamalkannya. Segala kegiatan yang memecahbelah wanita dan melemahkan kaum mereka hendaklah ditentang. Mereka tidak patut segan-segan untuk memperkatakan yang sebenar kerana ini adalah tanggungjawab mereka. Dan tanggungjawab yang terpenting sekali ialah terhadap anak dan adik di rumah yang begitu mudah terpengaruh dengan aliran semasa. Wanita harus ada pengetahuan atau tempat rujukan supaya trend yang tidak sihat yang kita lihat di kalangan anak dan adik kita dapat disekat dari berkembang.

#### PEMUDA

Bagi Pemuda pula peranan dan tanggungjawab tidak kurang pentingnya kerana masa depan parti dan negara bergantung kepada gerak-geri mereka. Ada pendapat yang berkata bahawa pemuda harus jadi "pressure group" yang menyedarkan parti tentang tanggungjawabnya. **Sebenarnya seluruh negara, bahkan tiap-tiap seorang dari rakyat Malaysia tidak buat lain melainkan menyedar parti dan pemimpin tentang tanggungjawab mereka.** Kalau kita baca akhbar, hadir perjumpaan atau kita baca surat layang atau kita dikunjungi oleh sesiapa, atau dengar bahasan dalam Dewan atau mana-mana dialog, seminar, simposium, atau rumusan tentang perkara-perkara tertentu atau di mana saja rakyat atau bukan rakyat berkumpul di apa juga peringkat dan taraf, tidak dapat tidak tumpuan diberi kepada mengingatkan Kerajaan dan parti serta pemimpin yang berkuasa tentang tanggungjawab mereka secara terperinci dalam semua

bidang. Yang jelas ialah peranan "pressure group" untuk memperingat Kerajaan adalah satu peranan yang universal di Malaysia yang demokratik. Semua orang tahu bagaimana Kerajaan patut diuruskan. Dalam keadaan seperti ini sungguhpun pemuda patut juga memainkan peranan sebagai "pressure group" yang menyedarkan parti dan Kerajaan, peranan ini tidaklah menjadi peranan yang terutama atau terpenting sekali.

### LATIHAN

Peranan penting dan utama bagi golongan muda ialah menentukan bahawa mereka terlatih dan faham hasrat dan dasar negara. Kita lihat di negara ini terlalu ramai muda-mudi yang sudah hilang nilai-nilai yang baik dan oleh itu telah hilang haluan. Usaha telah dijalankan oleh beberapa orang dan kumpulan tertentu untuk menghancurkan pegangan kepada nilai-nilai yang telah membawa kejayaan dan kebahagiaan dan sebaliknya mengganti dengan nilai-nilai yang boleh merosakkan masyarakat. Sama ada orang yang berbuat demikian tahu atau tidak tahu kesan kegiatan mereka, tidak perlu diperbincang atau dijadikan alasan. Yang penting ialah masyarakat dan kaum dan negara akan hancur kerana kegiatan ini.

Semangat kebangsaan umpamanya telah dijadikan suatu perasaan yang dikeji di kalangan pelajar Melayu. Kononnya semangat kebangsaan Melayu adalah bertentangan dengan ajaran Islam. Mereka ini mengenenpikan firman Tuhan berkenaan dengan wujudnya orang berbagai bangsa dan persaudaraan antara mereka yang menjadi umat Islam. Mereka tidak menghiraukan tidak



adanya tegahan terhadap perasaan kebangsaan. Mereka tidak mahu terima kenyataan bahawa perasaan kebangsaan tidak akan mengurangkan taqwa seseorang kepada Tuhan.

Orang yang mengecam perasaan kebangsaan tidak pula tunjuk perasaan persaudaraan antara umat Islam seperti dituntut oleh Allah Subhanahuwataala. Kerana kononnya perasaan kebangsaan itu bertentangan dengan Islam mereka ini membelakangkan seruan agama yang lebih penting iaitu persaudaraan dalam Islam. Oleh itu kita lihat orang yang mendakwa diri mereka sebagai berpegang kepada Islam dalam menentang nasionalisma, tidak pula takut menolak kehendak Islam dalam soal persaudaraan. Mereka ini mengecam kuat dan mengasingkan diri dari perjuangan bahagian yang besar dari orang Islam dalam negara ini kerana tidak suka kepada perjuangan yang berasaskan kebangsaan.

### TEKANAN

Jika benarlah mereka ini cuma mengutamakan kelslaman dan perjuangan mereka adalah semata-mata untuk Islam, kenapakah mereka tidak rasai tekanan terhadap orang Afghanistan sebagai tekanan terhadap diri mereka sendiri. Sementara orang Afghan memikul senjata dan berperang untuk Afghanistan, mereka dari Malaysia cuma bercakap dan menulis sahaja. Mereka tidak pun menderma untuk bangsa Afghan. Sebenarnya mereka berpendapat bahawa peperangan di Afghanistan adalah masalah kebangsaan Afghan, dan mereka sebagai orang Melayu masih perlu perhatikan perkara titik-bengik orang Melayu. Dengan perkataan

lain perasaan mereka ialah perasaan kebangsaan, walaupun secara negatif. **Dakwaan mereka bahawa kebangsaan adalah tidak Islam bukan sahaja tidak berasas tetapi cuma mencerminkan "hypocrisy" di kalangan mereka.** Mereka tahu benar bahawa tanpa perasaan kebangsaan mereka tidak akan ada tempat di mana-mana dan mereka tidak ada tempat untuk berlindung. Di dalam perhimpunan-perhimpunan antara-bangsa yang mereka hadiri, mereka mendakwa diri mereka sebagai orang Islam Malaysia, khusus orang Melayu dan bukan semata-mata orang Islam dunia yang bertanggungjawab sepenuhnya kepada umat Islam di mana sahaja dengan tanggungjawab yang tidak membeza negara atau wilayah.

Mereka ini samalah dengan satu kumpulan orang Islam di India yang tidak menyokong penubuhan Pakistan oleh Mohd. Ali Jinnah kerana kononnya Islam tidak mengiktiraf sempadan bentukan manusia — tetapi mereka ini telah awal-awal lagi lari ke Pakistan apabila negara itu ditubuh untuk mendapat nikmat dari kebangsaan Pakistan yang memberi perlindungan kepada Islam dan orang-orang Islam. Dan mereka ini juga setelah diselamatkan dengan penubuhan Pakistan terus menubuh parti politik yang kononnya berasas kepada Islam dan cuba merebut kuasa untuk diri sendiri. Begitu juga di Malaysia. Orang yang tidak mahu kemerdekaan dan menentang Parti Perikatan yang menuntut kemerdekaan, hari ini tidak segan-segan mencuba rebut kuasa melalui cara memecahbelah orang Islam.

#### ADAB

Semangat kebangsaan adalah satu daripada banyak nilai-nilai yang baik yang telah merosot di kalangan

masyarakat Melayu dan Malaysia yang pemuda harus memberi perhatian yang serius. Nilai-nilai seperti ketertipan, kemajuan, kebersihan, beradab dan beradap, bersopan santun dan lain-lain lagi sudah pun tidak begitu dihargai lagi. Memang benar kita harus kurang ajar sedikit — tetapi kurang ajar sedikit tidak bermakna kurang ajar sehingga tidak berlandas langsung. Kurang ajar yang dimaksudkan cuma setakat menegur apabila teguran perlu — dengan cara yang tidak menyakit hati. Tetapi hari ini yang diamalkan cuma kurang ajar sahaja — tanpa niat baik dan tanpa sebab yang perlu atau tidak.

Masyarakat hari ini masih boleh mempertahankan kestabilannya kerana masih ada mereka yang memegang kepada nilai dan adat resam lama yang baik. Tetapi generasi lama ini akan beransur-ansur luput dan akan diganti dengan generasi baru yang mempunyai nilai yang saya sebutkan tadi. **Kemungkinan masyarakat akan datang hilang kestabilannya kerana tidak punyai ketertipan dan adat resam hidup bermasyarakat amatlah besar** — jika hari ini generasi muda tidak mula memperhidupkan semula nilai-nilai yang baik.

Inilah peranan yang patut dimainkan oleh pemuda. Peranan ini memang lebih sukar dimainkan dengan berkesan — memang tidak spectacular dan tidak popular. Tetapi ianya lebih penting untuk kesejahteraan dan kebahagiaan masyarakat. Memilih yang mudah dan popular adalah satu bukti kelemahan. Nilai baik memang tidak cukup dengan nafsu. Tetapi Pemuda UMNO bukan seperti pemuda parti lain. **UMNO adalah parti yang bertanggungjawab dan pemudanya tidak boleh utamakan cuma yang popular**

**sahaja tanpa menghirau nasib bangsa, agama dan tanahair.**

## MASYARAKAT

Peranan Pemuda tidak harus tertumpu kepada ahlinya sahaja. Tiap-tiap ahli hendaklah menjadi contoh yang baik. Tetapi pemuda juga harus titik-beratkan masyarakat di luar gerakannya. Serulah kepada kebaikan. Jangan sekali kita turut cara dan kelakuan orang yang melawan kita yang selalunya mencaci, memaki hamun dan menyeru kepada keburukan yang bertentangan dengan agama Islam dan adat resam peradaban Melayu. Pemuda harus berani bukan sahaja memperkatakan yang benar dan baik, tetapi harus berani memperjuangkannya. Pemuda harus perangi nafsu yang selalu mendorong kepada yang mudah dan sedap seperti menyalahkan orang lain dan Kerajaan, dan sebaliknya memikul bersama beban menegakkan yang benar. **Cuma dengan keberanian memperjuangkan nilai dan amalan yang baik sahaja barulah masyarakat kita akan menjadi kukuh dan boleh menyelamatkan kita dari segala bahaya.**

Aliran ini memang tidak akan jadikan Pemuda sasaran perhatian akhbar dan orang ramai. Dan mungkin pula pemuda diperhinakan dan diejek-ejek oleh kumpulan-kumpulan tertentu. Tetapi pejuang tidak harus takut atau kecewa dalam memperjuangkan yang benar dan baik. Kita disuruh oleh agama Islam supaya seru kepada kebaikan dan ini harus dilakukan oleh Pemuda bukan kerana kepentingan diri tetapi kerana kebaikan masyarakat.

## SASARAN

Saudara saudari sekalian, parti yang memerintah tidak seperti parti pembangkang dan orang lain. Memang mudah mencari salah di sisi orang yang terpaksa membuat keputusan — iaitu decision-makers yang bertanggungjawab yang terpaksa memilih antara beberapa pilihan. Yang tidak dipilih memang boleh mendapat juaranya. Memang pula yang tidak dipilih lebih ramai dari yang dipilih. Jadi tidaklah hairan jika parti yang berkuasa menentukan sesuatu menjadi sasaran tiap kali pilihan dilakukan.

Contoh yang jelas ialah apabila sesuatu peluang kerja atau biasiswa atau lesen atau tanah direbut oleh ramai pemohon; walau siapa pun yang berjaya, yang gagal tentu lebih ramai. Sementara yang berjaya mudah lupa bersyukur atau menganggap pemilihannya sebagai memang hak baginya, yang gagal bukan sahaja ramai tetapi akan sentiasa teringat tentang nasib buruknya dan menyalahkan orang yang membuat keputusan menolaknya.

## POPULAR

Sebab itu pemuda tidak perlu menumpukan kepada peranan yang popular, iaitu mengkritik pihak yang terpaksa memilih dan membuat keputusan. **Memang lebih ramai yang berminat jikalau pemuda menjadi juara orang yang gagal. Yang penting bukan kegagalan tetapi keputusan yang adil.** Jika keputusan adil dibuat, itu yang perlu diberi perhatian. Keputusan yang adil adalah satu kebaikan, dan pemuda perlu perjuangkan kebaikan kerana akhirnya kebaikan akan membawa kebahagiaan kepada masyarakat umumnya.

Pemuda tidak harus terikut-ikut dengan yang popular sahaja kerana yang disukai ramai tidak semestinya baik. **Nilai perlu dibuat tentang baik buruknya sesuatu amalan atau aliran dalam masyarakat dan setelah ditentukan yang mana yang baik dan yang mana yang buruk, maka yang baik itulah yang perlu disokong dan diperjuangkan, walaupun tidak popular.**

Mereka yang menentang kita suka kepada yang buruk dan bertentangan dengan agama Islam. Mereka menyeru kepada yang buruk tanpa menghiraukan Islam. Sebab itu kita lihat mereka, tanpa takut kepada Tuhan, secara terbuka menyeru supaya umat Islam berpecahbelah, menolak persaudaraan dalam Islam, mengkafirkan orang Islam, mengugut orang Islam dengan tidak mahu sembahyang mayat dan lain-lain dan memaki-hamun apabila sahaja mereka membuka mulut. Amat malang sekali ada sebilangan orang Islam yang cenderung dan tertarik kepada perbuatan yang ditegah oleh Islam.

Memandang keadaan ini maka Pemuda harus lebih-lebih lagi mempertahankan nilai dan amalan yang baik yang semuanya dituntut oleh Islam. Kalau mereka menyeru kepada pecahbelah dan menolak persaudaraan, pemuda harus mempertahankan dan menyeru kepada perpaduan dan persaudaraan. Kalau rakyat diugut, pemuda mesti melengkapkan diri untuk menumpulkan ugutan itu. Pendekatan pemuda harus di barisan hadapan dalam mempertahankan dan memperjuang nilai dan ajaran Islam. Serulah kepada mereka yang sudah hampir sesat dan tidak takut kepada Tuhan supaya balik ke jalan yang diredai oleh Allah Subhanahuwataala.

Saudara saudari sekalian, hari ini kita berkumpul untuk menentu dan mengekalkan keutuhan parti dalam memperjuangkan nasib agama, bangsa dan negara kita.

Syukur Alhamdulillah, kita masih berada dalam keadaan terselamat untuk bermesyuarat dengan tenang. Kita tidak menderita seperti orang Kemboja, Afghanistan, Turkestan, Yaman dan lain-lain yang tertindas kerana musuh-musuh Islam. Syukur Alhamdulillah sekali lagi dan seribu kali lagi.

### KESYUKURAN

Tetapi kesyukuran tidak harus tinggal di bibir sahaja. **Kesyukuran mestilah diikuti dengan ibadah dan amalan yang boleh mengekalkan nasib baik kita.** Sementara orang lain mengutamakan rupabentuk Islam rekaan mereka, kita harus amalkan ajaran Islam yang sebenar. Kita harus lengkapkan diri dan tentukan keselamatan kita tidak diganggu-gugat kerana adanya kumpulan-kumpulan serpihan yang sengaja membuka jalan untuk musuh Islam menapak dan menakluk kita. Gandakan usaha menerang perjuangan UMNO yang berlandaskan agama Islam supaya perpaduan dan persaudaraan orang Islam yang 34 tahun dahulu telah menyelamatkan mereka dari rancangan Malayan Union British dapat dicapai semula untuk menyelamatkan orang Islam Malaysia di hari ini.

Maka dengan ini saya dengan segala sukacitanya merasmikan Perhimpunan Agung Pemuda dan Wanita UMNO bagi tahun 1980.

Wabillahi Taufik Wassalamualaikum Warahmatullahi Wabarakatuh.